



Sabtu, 02 April 2022
Ogen: Esekiel33:10-20



Jera Dat Kegeluhan



Tuhan e Tuhan erdolat kap, la ukurna meriah ngidah kalak si perdosa mate. Riahen ukurNa ngidahsa kalak perdosa ngadi erbahan dosa gelah ia nggeluh. Enda me ranan Tuhan man Esekiel. Sada keriahen ukur kel man Tuhan ngidah bangsaNa jera. Jera e me ngejapken kerna kesalahen dingen kelepaken si enggo ilakoken, ngakukensa i adep-adepen Dibata dingen mindo perkuah ateNa segelah ula ertak-tak kerna kesalahen si ndube. Kalak si jera enda ngaloken pengalemi dosa kap. Janah muat sada padan nadingken kegeluhen si melket, dingen ndalanken kegeluhen si mehuli sentudu ras peraten Dibata.

Mekatep sioge pe ranan sibelasken Jesus maka Ia reh guna kalak sakit labo kalak sehat. Ersurak meriah malaikat si ni surga ngidah kalak si erdosa mulihken kempak si benar, bagi biri-biri si lalar entah bagi anak si bene mulih kempak bapana. Enda kerina bagin si usur kel isingetken bas Pustakan Si Badia. La terjeng si e bas liturgi-liturgi siniaturken gerejanta tep-tep mingguna pe ipebengket bagin enda. Kalak si ngasup ngaloken kata Dibata e me kalak si enggo leben ngakuken salah lepakna dingen ialemi Dibata kap. Si enggo ndatken pengalemi dosa nge si ngasup merespon perbahanen Dibata e alu nehken pengataken bujur, erbahan padan guna setia iadep-adepen Dibata dingen ngaloken pasu-pasu bas Dibata nari.

Mekatep sibelasken maka kita enda manusia si labo sempurna, lemah dingen mesunah kote. Erdandanken si e me maka perlu kel teptep wari jera, teptep warina Dibata erlebuh ndilo kita. Kalak simegiken pendilo e dingen ngikutkenca ngaloken keterkelinen kap. Ambah si e si enggo ngeluh bas bujur, tetap lah ngeluh bas kebujuren, sabap kalak si ngadi erbahan bujur, jenari ibenakenna erbahan si jahat nina Dibata mate me ia erkiteken kejahatenna. Si apai pe kita, subuk jera bas si jahat nari, entah subuk ngeluh i bas benar, pedah Dibata wari enda gelah kita tetap nggit mpelimbarui geluhta tambah wari tambah ulina, tambah keterkelinen geluh sinialoken.